


殿



試

應

舉

人

臣  
包  
濤

特別  
U8  
7647



應

殿試舉人臣包濤年肆拾肆歲係浙江杭州府錢塘縣人由附學生應康熙伍拾年鄉試中式

由舉人應雍正貳年會試中式今應

殿試謹將三代脚色并所習經書開具於後


一 三代


曾祖震翼 不仕故


祖啟仍 不仕故


父紹穀 不仕故

一 習詩經









第二甲第六十三名

第二甲第六十三名

臣對臣聞帝王之建極綏猷而開萬年有道之長也必能  
統馭通於一心而其神明之內運者常舉卿事之職士庶  
之隱無不靜涵於淵默斯官常士習與民風而丕振必能  
規朝野於百度而其經緯之外張者常舉臣工之志黎庶  
之心無不動闕乎謨訓斯羣臣多士率百姓而從風由是  
而徵之在位則九德六德三德俞受敷施而朝有啓沃之  
休由是而驗之百司則有猷有爲有守潔已奉公而吏有  
奏最之績由是而考之學校則六德六行六藝崇術立教  
而士有敦脩之實由是而觀之草野則惟脩惟和惟叙敦  
龐淳厚而民有務本之行蓋惟其精神之所攝智慮之所  
周紀綱之所播實皆統馭通於一心規朝野於百度故能  
至治昭宣大化翔洽而萬象含輝百靈效順休徵協應諸



福並臻自昔唐虞三代之隆其所爲積之甚厚致之有道  
而應之亦極神速焉者蓋上下千百載而如一轍也欽惟  
皇帝陛下

乾行恒泰

離照咸臨

寶曆方膺九域已躋仁壽

瑤圖在握萬年永奏和豐

心契千聖之心源從容中道自是參天兩地

治綜百王之治術優游上理無非緯武經文

璧水溢恩波經幄弘開園橋多于邁之英會見雲呈五色星

聚五奎瑞叶先華之復旦

珠鋤先履畝朱紘戒事萬井動奄觀之樂忻看麥秀兩歧禾

登兩穗祥符肅乂之從時化理遠覃固已小邦懷而大邦  
畏風聲遐播固已要服貢而荒服王功德固已蕩蕩而巍  
巍治象固已麟麟而炳炳乃

聖懷若谷雖安而猶若未安納善如流已治而益求其治爰進  
臣等於

廷而策之人臣公忠之道廉潔之操士尚躬行之實農勤力  
作之原以臣至愚極陋何足與知師濟之淵衷何敢遽言  
生人之至計然幸生休明之世涵濡沐浴於教澤者亦既  
有年今當

清問下逮敢不敬竭愚誠以効芻蕘之一得乎伏讀

制策有曰推心置腹以待臣下凡厥有位宜皆公爾忘私矢精  
白於隱微之地大哉

聖訓此誠萬古臣道之極則也臣聞君臣之道本同一體元首  
股肱有虞氏之歌也腹心手足子輿氏之詞也故高爵厚  
祿君厚待乎臣者臣不可以薄報乎君官守言責臣誠事  
乎君者君亦必不泛視乎臣匪徒以奔走承順爲盡乃事  
也必實矢之隱微之地直時時若天帝之鑒臨而不敢留  
纖毫之內愧使外可以謝人之責者內仍不可以慊己之  
意也匪徒以畢智殫力爲稱乃職也必永矢之終身之久  
直事事皆寤寐之勿諼而不敢安目前之苟且使今幸以  
完己之名者後終未盡以免人之議也誠如是以相儆勉  
將公爾忘私而身家之事自不足以累其念利祿之計自  
不足以中其懷公正無私之學庶幾不愧忠誠不二之心  
庶幾稍盡矣

制策有曰慎簡大吏下逮守令皆務得人欲其興事慎憲有裨  
地方匪直潔己自好而已此尤澄叙官方立綱陳紀之盛  
意也夫勢與時遷事因時起故事有宜於昔而不宜於今  
者有宜於彼而不宜於此者一切視為可行則紛更滋弊  
不如慎守前轍之為得也一切置為難行則積久廢弛不  
如振作更張之為得也是必得其人焉有辦事之能有審  
時之識有度務之才有觀變之智將興一事而一如行其  
所無事於已然之成憲不悖也守一法而不妨通之以良  
法於因時之切務有合也若徒兢兢焉以潔己自好為能  
則貪墨之污亦僅免其罪於一己於民生何裨之有彼古  
稱清淨為治行第一又殷殷以獄市為寄者亦第謹守緘  
尺後世俗吏之見耳豈治道之大隆者而出此乎

制策有曰士爲四民之首必敦尚學行以倡風化今欲崇德絀  
惡勸懲之互用此更崇尚實學維風正習之至心也夫古  
者國之貴遊則領以師氏保氏教於虎門以升於太學其  
俊秀之士則教以司徒樂正而升之學七年小成九年大  
成而後之以其官今我

皇上崇儒右文加意科目士之稍有才識者皆得勵志束身以  
期報稱然或不免猶有務華鮮實甚且囂凌狙詐者重煩  
聖慮豈誠漸摩化導尚有未至歟亦其習染之深稟質之戾不  
克自振拔也然則勸之固不可以不至而懲之又安可以  
或寬也哉是必如古郊遂之移寄棘之屏不少貸焉而採  
其實於鄉評專其責於司教庶乎愚者知所警省而頑者  
知所畏懼則不率者翻然而易慮即彼率者亦愈奮然而


加勵焉矣

制策有曰戶口日以蕃滋地畝止有此數欲講求農政竭人力以盡地利務期家給而戶足此愈見我

皇上好生如天保民若子之厚德矣考之成周以農事開基而膺過曆之祥豳風豳雅豳頌詠歌農事者獨詳周公官禮一書亦於農政農官尤為備悉農務果若斯之重也第小民極愚知身家之愛而罔知為身家之計故利之所在輒爭趨之商賈居竒贏百工爭淫巧皆足以蠹農而病穀豈知天下無勿食之民而有不耕之民不耕則何以得食也天之所生地之所養常足以供人之所需人衆者固多人滿之患而地大者亦多土滿之憂苟游惰者皆驅之使歸於南畝則石田草宅亦一易再易而漸成膏腴矣安在間

田隙地不爲利藪也耶是在牧民者循行勸課使之習勤  
於沃土而毋病不材使之致勞於瘠土而愈知向義則貴  
農之效成矣凡此者事若殊塗理一致一者何也天也我  
皇上本法天行健之心致憲天出治之政天道以至誠不已者  
運於穆清之表而四時行百物生所謂無心而化成不言  
而利美也

聖德以至誠無息者深於宥密之中而百官正萬民安所謂德  
盛而化神功深而效著也上乾而下惕道一而風同我  
國家萬年有道之長基諸此矣臣草茅新進罔識忌諱干冒  
宸嚴不勝戰慄隕越之至臣謹對






印卷官禮部

主客清吏司郎

中臣鄧葵友

儀制清吏司郎中加三級臣羅丹  
祠祭清吏司主事加一級臣汪見祺



彌封官關防

彌封官關防

